

ALTA CONNECTIONS

Tsab Ntawv Xov Xwm Luam Tawm Ib Xyoo Plaub Zaug Coj Los Qhia Cov Neeg Peb Pab, Cov Neeg los sis Chaw Npaj Cov Kev Pab, thiab Cov Neeg Ua Hauj Lwm Rau Alta



Lus qhia ntxiv txog peb **tus kws kos duab Jacob Maddox** phab 12

TUS NEEG SAIB XYUAS KEV KHIIV HAUJ LWM COV LUS TSHAJ XO

Tus Neeg Saib Xyuas Kev Khiav Hauj Lwm Lori Banales

Employment First (Kev Ua Hauj Lwm Yog Qhov Ua Ntej) yog ib tus qauv rau kev pauv nyob thoob plaws hauv lub teb chaws uas hais txog tej yam yuav ua tau nyob hauv ib lub chaw ua hauj lwm. Tus qauv ntawm no hais tias txhua tus tib neeg, suav nrog rau cov tib neeg uas lawv muaj ib cov xiam oob qhab loj, yeej muaj peev xwm yuav mus ua tau hauj lwm. Kev pab cov tib neeg uas pab hauj lwm nyob hauv cov chaw ua hauj lwm yeej yuav tsum kom cov chaw ua hauj lwm muaj neeg ua hauj lwm coob txaus thiab mob siab los mus sib pab. Qhov tseeb, lub chaw pab cov neeg muaj teeb meem rau ntawm txoj kev loj hlob yeej tau muaj teeb meem hais txog txoj kev yuav rov qab qhib kom muaj cov kev pab tim ntsej tim muag rau thaum lub sij hawm uas lawv yuav tau nrhiav thiab ntiav ib cov neeg tshiaj tuaj ua hauj lwm. Qhov no yeej yog ib yam teeb meem uas muaj nyob thoob plaws hauv lub xeev thiab yog ib qhov teeb meem uas peb cia siab hais tias peb yuav los mus daws. Tau ntau ntau hli los rau tam sim no, Alta California Regional Center (ACRC) yeej tau mus koom tes nrog Valley Mountain Regional Center (VMRC) los mus sib pab nrhiav ib lub zeem muag coj los ua kom nrhiav tau neeg los mus ua yam hauj lwm pab cov neeg muaj teeb meem rau ntawm txoj kev loj hlob. Ntau txoj cai ntawm lub xeev cov cai yeej yog los mus txhawb lub tswv yim uas yuav muab tus neeg coj los saib ua qhov tseem ceeb. Peb sawv daws yeej nyiam lub tswv yim ntawm no thiab yuav kom ua tau zoo li lub tswv yim ntawm no, peb yuav tsum tau muaj neeg ua hauj lwm coob ntxiv es peb thiaj li yuav pab tau coob tus neeg ntxiv zoo li qhov uas yuav tsum tau muaj rau tus neeg siv.

MUJ DAB TSI NYOB HAUV TSAB NTAWV XOY XWM TSHWJ XEEB NTAWM NO UAS YOG HAIS TXOG KEV UA HAUJ LWM:

- LUS TSHAJ XO LOS NTAWM TUS NEEG SAIB XYUAS KEV KHIIV HAUJ LWM
- KEV KOOM TES NROG SIERRA COLLEGE
- 10 XYOO NTAWM KEV UA HAUJ LWM ZAUM 1
- ACRC TUS KWS PAB NEEG NRHIIV HAUJ LWM
- DAIM DUAB QHIA TXOJ KEV MUS UA COV HAUJ LWM UAS COV NEEG TSIS XIAM OOB QHAB UA
- LUS QHUAS COV NEEG UA HAUJ LWM
- LUS QHUAS COV NEEG UAS PEB PAB
- MUAB ACRC COJ LOS SAIB ZOO LI IB COV LEJ
- LUS PIAV QHIA TXOG IB TUS KWS KOS DUAB UAS PEB TAU XAIV COJ LOS QHIA RAU SAWV DAWS
- KEV NPAJ COJ LOS THOV KEV PAB RAU TSEV NEEG

TUS NEEG SAIB XYUAS KEV KHIAV HAUJ LWM COV LUS TSHAJ XO - TXUAS NTXIV

Tus Neeg Saib Xyuas Kev Khiav Hauj Lwm - Lori Banales

VMRC/ACRC Cov Kws Uas Yog Cov Pab Tus Neeg (DPS (Direct Support Professionals)) yeej paub cov teeb meem uas muaj tam sim no thiab yeej mus nrog cov neeg npaj kev pab nyob rau ib ncig ntawd koom tes los mus nrhiav ib txoj kev pab tus neeg mus rau yav tom ntej. Peb yeej tau mus ntiav lub chaw tuav dej num rau kev ua kom muaj suab npe zoo coj los pab peb muab Qhov Kev Pab Cov Neeg Muaj Teeb Meem Rau Ntawm Txoj Kev Loj Hlob (Developmental Services System) tshaj tawm zoo li ib lub cib fim ua hauj lwm rau cov neeg muaj txuj ci siab uas lawv tab tom nrhiav ib txoj hauj lwm tseem ceeb rau lawv ua. Peb yuav muaj ib qhov kev tshaj tawm uas yuav qhia kom neeg mus rau ntawm ib lub vas sab (website) uas peb tau tsim coj los teev cov ntsiab lus qhia txog lub chaw tuav dej num saib xyuas cov neeg npaj kev pab thiab cov chaw pab tib neeg nyob rau tej cheeb tsam uas yuav coj lawv ncaj qha mus rau ntawm phab ntawv mus tso npe thov ua hauj lwm. Lub vas sab ntawm no yeej muaj qhov uas neeg yuav xaiv hais tias saib lawv xav kom nrhiav cov hauj lwm zoo li cas, zoo li nrhiav raws nroog, raws zip code thiab raws yam hauj lwm, uas nws yuav coj ib tus neeg nrhiav hauj lwm ncaj qha mus rau ntawm phab ntawv uas muaj cov hauj lwm zoo li qhov nws hais kom nrhiav. Peb tab tom caw tag nrho ACRC thiab VMRC cov neeg npaj kev pab kom lawv muab cov hauj lwm uas lawv muaj coj mus tso rau hauv lub vas sab ntawm no. Ntxiv ntawd, peb yuav muaj cov kev sib sau mus tshaj tawm hauj lwm hu ua Job Expos nyob rau ib ncig ntawm txhua lub chaw pab neeg nyob rau tej cheeb tsam uas peb cia siab hais tias neeg yuav tuaj koom thiab peb yuav nrhiav tau ib cov neeg tshiab mus khiav cov hauj lwm uas peb npaj nyias txawv nyias rau cov tib neeg uas peb pab. Txawm hais tias tsab ntawv xov xwm ntawm no yeej yog hais txog cib fim ua hauj lwm xwb los, peb yeej tseem pom thiab txhawb txoj kev yuav tsum tau rov qab nrhiav kom muaj neeg ua hauj lwm nyob rau ntawm txhua lub chaw sub cov neeg peb pab uas lawv muaj hnuv nyoog laus thiab hluas tib si thiab muaj kev xiam oob qhab nyob rau theem twg los thiaj li yuav mus siv tau cov kev pab uas lawv siv thiab cov kev pab uas muaj rau neeg xaiv.



ACRC YEEJ TAU MUS KOOM TES NROG SIERRA COLLEGE HAIS TXOG QHOV NYIAJ PAB UAS LUB CHAW TUAV DEJ NUM SAIB XYUAS KEV PAB RAU KEV UA HAUJ LWM NTAWM COV NEEG MUAJ TEEB MEEM RAU NTAWM TXOJ KEV LOJ HLOB (DEPARTMENT OF DEVELOPMENTAL SERVICE) MUAJ

Nyob hauv xyoo 2022, Lub Chaw Tuav Dej Num Saib Xyuas Kev Pab Rau Cov Neeg Muaj Teeb Meem Rau Ntawm Txoj Kev Loj Hlob (Department of Developmental Services) tau npaj muaj ib cov nyiaj coj los ua kom muaj ntau txoj kev ntxiv rau neeg mus ua hauj lwm. Lawv twb muab \$10 lab rau ntau lub chaw khiav hauj lwm nyob thoob plaws hauv lub xeev siv coj los khiav cov hauj lwm rau kev qhia cov neeg ua hauj lwm, kev kho cov kev pab uas muaj tam sim no, thiab kev tsim kom muaj kev pab nyob ntawm cov chaw hauj lwm. Nyob ib ncig ntawm thaj chaw ACRC khiav hauj lwm, nws yuav muaj ntau qhov kev kho uas yog tsim coj los ua kom muaj cib fim ua hauj lwm ntau ntxiv rau cov tib neeg uas peb pab. Cov kev kho uas tseem tab tom npaj yog muaj ib qhov kev pab cuam los mus pab tswv yim, ib qhov kev koom tes nrog Sierra College, ib qhov kev qhia hauj lwm rau Txoj Kev Ua Hauj Lwm Raws Li Qhov Tus Neeg Yuav Ua Tau (Customized Employment), thiab ntau yam ntxiv. Cov koom haum uas tau cov nyiaj pab ntawm no yeej tseem nyuam qhuav pib khiav lawv qhov kev pab cuam xwb. ACRC yeej zoo siab heev hais tias peb yuav pom cov kev pab cuam khiav hauj lwm thiab peb yuav khiav hauj lwm los mus tshem cov teeb meem ntawm kev ua hauj lwm mus ntxiv tom ntej.



Nrog qhov kev oom tes uas nws muab nrog ACRC, Sierra College tau txais DDS Ib Qhov Nyiaj Pab Rau Kev Ua Hauj Lwm (Employment Grant) coj los siv rau lawv qhov kev pab cuam "Learning Independence for Future Employment (LIFE)" Program. Qhov kev pab cuam LIFE Program yuav tsim ib txoj kev coj los pab ua kom cov neeg mus nrhiav tau cov hauj lwm uas lawv yuav ua tau ntev ntev mus thiab lawv yuav ua tau txoj hauj lwm los ntawm kev npaj muaj cov kev pab thiab kev kawm nyob rau theem tsev kawm ntawv qib siab ob xyoos coj los qhib ib txoj kev rau rau lawv mus ua Cov Hauj Lwm Uas Cov Neeg Tsis Xiam Oob Qab Ua uas yuav ua tau ntev ntev mus. Vim lawv yog ib feem ntawm LIFE program, Sierra College yuav koom tes nrog ACRC rau lawv qhov kev pab cuam Transition to Independent Living (Kev Pauv Mus Nyob Tus Kheej Uas Tsis Tag Yuav Muaj Lwm Tus Neeg Pab). Qhov kev pab cuam ntawm no yog ib qhov uas peb yuav muab npaj zoo li Taft College qhov kev cuam rau Kev Pauv Mus Nyob Tus Kheej Uas Tsis Tag Yuav Muaj Lwm Tus Neeg Pab uas nws yeej muaj ib cov kev qhia txhua coj los qhia cov neeg mus kawm kom lawv mus nyob tau lawv tus kheej thiab kom lawv mus nrhiav tau hauj lwm ua thaum lawv kawm tiav tsev kawm ntawv qib siab ob xyoos. Lub zeem muag ntawm no yeej yog ib lub uas ACRC xav muab coj los ua tus qauv pab peb lub hauv zos tau ntev los lawm. Kev muab qhov kev pab cuam ntawm no coj los siv yeej yog ib qhov uas tab tom pib lawm.

KEV MUAJ LUS ZOO SIAB 10 XYOO RAU NQIS LUS TSWJ HWM HU UA EMPLOYMENT FIRST IN CALIFORNIA

Xyoo no, California muaj kev zoo siab rau qhov hais tias peb twb muab peb nqis lus tswj hwm Employment First coj los siv tau ntev li 10 xyoo lawm. Thaum Lub Kaum Hli, Tim 9, 2013, California yog lub xeev thib 12 uas tau los muab ib nqis lus tswj hwm hais tias kev ua hauj lwm yog qhov tseem ceeb coj los ua ib tsab cai. Kev ua hauj lwm yog qhov tseem ceeb yog ib lub tswv yim uas txhais hais tias peb yuav muab txoj kev ua hauj lwm coj los ua qhov tseem ceeb tshaj rau txhua tus tib neeg muaj teeb meem rau ntawm txoj kev loj hlob uas lawv muaj hnuv nyoog siab txog qhov lawv yuav mus ua tau hauj lwm. Txij li thaum California tau muab nqis lus tswj hwm Employment First coj los ua ib tsab cai los mus, peb yeej tau nrhiav kev coj los ua kom muaj cov cib fim ua hauj lwm ntau ntxiv uas yog cov cib fim lawv yuav tau mus ua hauj lwm nrog cov neeg tsis xiam oob qhab. Thaum Lub Kaum Ob Hli 2022, ACRC muaj 2,120 tus neeg muaj hnuv nyoog 16-64 xyoos uas lawv yeej mus khwv tau nyiaj. Peb yeej zoo siab heev rau qhov uas peb tau sib zog los mus ua kom muaj cib fim mus ua hauj lwm nrog cov neeg tsis xiam oob qhab ntau ntxiv rau cov tib neeg uas muaj teeb meem rau ntawm txoj kev loj hlob thiab peb yeej cia siab ntsoov rau 10 xyoo txuas ntxiv tom ntej no rau nqis lus tswj hwm Employment First.

LUS QHUAS COV NEEG UA HAUJ LWM - TUS KWS PAB NEEG NRHIAV HAUJ LWM CARLY SHEARER



Kuv lub npe yog hu ua Carly Shearer thiab kuv yeej yug thiab loj hlob nyob hauv Sacramento, CA ntawm no. Kuv twb pib ua hauj lwm rau Alta California Regional Center txij li thaum Lub Plaub Hlis 2022 los lawm thiab kuv yeej ua tsaug ntau rau qhov uas kuv tau nrog ib cov neeg zoo ua hauj lwm. Kuv twb pib ua yam hauj lwm ntawm no thaum kuv muaj 18 xyoo los lawm uas yog ua rau ib lub chaw zov thiab saib xyuas cov neeg muaj teeb meem rau ntawm txoj kev coj tus cwj pwm thiab mam li pauv mus ua ib txoj hauj lwm uas tuav ntau ntawv nyob ntawm ib lub chaw nrhiav hauj lwm rau neeg ua tom qab kuv kawm ntawv tag. Ntawm kuv txoj hauj lwm uas yog ua Tus Kws Nrhiav Hauj Lwm Rau Neeg Ua (Client Employment Specialist), kuv yeej mus nrog Community Services koom tes saib xyuas cov chaw uas khiav hauj lwm rau ACRC qhov kev pab nrhiav hauj lwm rau neeg ua, yeej mus khiav cov dej num uas yuav tsim tau kev koom tes nrog ib chaw hauj lwm, thiab yeej npaj cov kev qhia hais txog cov kev pab rau kev ua hauj lwm uas ACRC yeej npaj tau, suav nrog rau CIE, PIPs, thiab Tailored Day Services. Qhov kuv nyiam tshaj nyob ntawm kuv txoj hauj lwm yog qhov uas kuv pom coob tus neeg nrhiav tau hauj lwm ua! Thaum kuv tsis muaj dab tsi ua, kuv nyiam tua games thiab mus nrog kuv tus khub thiab wb tus aub hu ua Jet ua si.

ACRC THIAB DAIM DUAB QHIA TXOJ KEV MUS UA COV HAUJ LWM UAS COV NEEG TSIS XIAM OOB QHAB UA (CIE)

Txoj Kev Mus Ua Cov Hauj Lwm Uas Cov Neeg Tsis Xiam Oob Qhab (Competitive Intergrated Employment (CIE)) yog dab tsi? CIE yog hais txog cov hauj lwm nyob ntawm ib lub chaw uas cov neeg tsis xiam oob qhab ua hauj lwm, yog hais txog kev ua hauj lwm nrog cov neeg uas tsis xiam oob qhab thiab kev tau nyiaj ua hauj lwm tsawg kawg los yuav tsum yog li ntawm qhov nyiaj ua hauj lwm tsawg kawg nkaus uas txoj cai pub them (minimum wage) thiab tus neeg yeej tau cov nyiaj pab thiab kev pab zoo li yam li cov nyiaj pab thiab kev pab uas cov neeg tsis xiam oob qhab tau thiab yeej muaj cov cib fim zoo ib yam li cov cib fim uas txhua tus neeg tuav tib txoj hauj lwm ntawd muaj. Txhua tus neeg yeej nyias muaj nyias ib txoj kev txawv hais txog CIE. Ib qhov kev npaj uas muab tus neeg saib ua qhov tseem ceeb raws li qhov tus neeg xaiv thiab nyiam yuav ua rau tus neeg muaj kev zoo siab tshaj los ntawm qhov hais tias nws ua tau tiav raws li qhov nws xav ua. Qhov uas cov neeg sib pab hauj lwm thiab tsev neeg los mus sib tham thaum ntxov hais txog txhua yam uas muaj rau lawv tus neeg xaiv yeej yog ib yam uas yuav pab tau thiab tseem ceeb. Piv txwv, ib tus me nyuam cov hauj lwm tom tsev kawm ntawv thiab hauv tsev thiab cov dej num niaj hunb ua tom tsev kawm ntawv yeej pab qhia tau hais tias tej yam uas tus me nyuam ua tau zoo, tej yam uas tus me nyuam xav ua thiab nyiam ua hais txog kev ua hauj lwm hauv lub neej ntev mus yog dab tsi.

Thaum tus me nyuam kawm tsev kawm ntawv them pib (elementary school) mus rau them nruab nrab (middle school), peb yeej xav kom cov neeg sib pab hauj lwm rau qhov kev qhia ntawv IEP, cov neeg sib pab hauj lwm rau txoj kev npaj, thiab tsev neeg los mus sib tham tsis tseg hais txog cov cib fim ua hauj lwm. Qhov kev sib tham ntawm no yuav muaj pauv thiab yuav muaj ntau yam ntxiv thaum lub sij hawm dhau mus zus zuj.

Kev mus pab hauj lwm dawb yeej yog ib cov cib rau cov tib neeg uas lawv xav mus nrhiav thiab xav mus ua hauj lwm. Thaum ib tus neeg mus pab hauj lwm dawb, tus neeg yuav muaj cib fim mus sim ua ntau txoj hauj lwm, ntau yam hauj lwm, thiab mus ua nyob ntawm ntau lub chaw hauj lwm. Piv txwv, tus neeg puas nyiam ua ib txoj hauj lwm uas nws ua nws ib leeg los sis ib txoj hauj lwm uas muaj coob tus neeg nrog nws ua hauj lwm ua ke? Nyiam Ua Cov Hauj Lwm Ua Nyob Hauv Tsev los sis Nyob Sab Nraum Zoov? Nws yeej muaj txiaj ntsim ntau heev nyob hauv cov hauj lwm ntawm no. Cov cib fim ua hauj lwm them nyiaj thiab ua hauj lwm pab dawb yeej ua rau tus neeg muaj kev cia siab rau tus kheej, muaj kev zoo siab, muaj kev sib hwm, muaj kev xav hais tias nws yeej muaj nuj nqis, thiab muaj kev xav hais tias nws yeej yog ib tus neeg zoo ib yam li lwm cov neeg. Daim Duab Qhia Kev Mus Rau CIE yeej yob ib daim duab uas peb tsim coj los pab cov yim neeg, cov uas peb pab thiab cov neeg sib pab hauj lwm kom lawv paub hais tias lawv yuav ua li cas lawv thiab li ua tiav cov kauj ruam tseem ceeb thaum lawv xav txog cov cib fim CIE thiab yog ib daim duab uas peb muab neeg faib mus ua 4 pawg raws li lawv lub hnuv nyoog: 12-15, 16-17, 18-21, thiab 22-64. Txhua qhov yeej muaj ib cov tswv yim thiab ib cov kev pab hais txog txoj kev npaj rau kev ua hauj lwm.

Peb yeej mob siab los mus ua raws nraim li tus qauv tseem ceeb ntawm no thiab los mus ua kom tau qhov zoo tshaj rau cov neeg uas peb pab. Thov mus saib hauv ACRC lub vas sab mus kawm kom paub ntxiv txog Daim Duab Qhia Kev Mus Rau CIE thiab kom paub ntxiv txog cov hauv kev uas ACRC yuav muab lus qhua rau cov neeg uas peb pab nyob tom hauj lwm: <https://www.altaregional.org/post/competitive-integrated-employment-cie>

Renee

12 xyoo dhau los, Renee Minor tau mus koom Southside Unlimited nyob hauv Work of Art Program. Peb hnuv rau ib lim piam, nws yeej tau mus kos duab thiab ua tej khoom siv tes ua, ntaus suab paj nruas, thiab muaj cib fim mus ntsib ib cov neeg uas lawv yog nws phooj ywg tam sim no lawm. Tom qab ntawd, nws ho pauv mus ua hauj lwm nyob ntawm lub chaw tuav dej num saib xyuas kev ua hauj lwm, uas nws mus ua ib tus neeg txheeb cov khoom uas yuav rov qab muab coj mus ua dua tshiab. Nws los kuj tseem tau mus kawm ntawv thiab kawm hauj lwm coj los npaj kom nws mus nrhiav tau ib txoj hauj lwm ua. Hauv xyoo 2021, thaum nws rov qab tuaj ua hauj lwm thaum dhau lub sij hawm peb kaw vim muaj kab mob COVID, Renee mus nrog nws tus kws nrhiav hauj lwm sib tham hais txog nws txoj kev nrhiav hauj lwm ntxiv. "Kuv yeej npaj tau hais tias kuv yuav ua li ntawd lawm! Kuv yeej nyiam ua hauj lwm nyob ntawm lub chaw txheeb khoom pov tseg thiab yeej nyiam txhua tus neeg nyob ntawm no, tiam sis nws txog sij hawm rau kuv mus ua ib txoj hauj lwm tshiab lawm." Thaum tus kws nrhiav hauj lwm nug hais tias Renee xav ua yam hauj lwm dab tsi, Renee yeej zoo siab hlo los mus teb hais tias, "Chaw zov me nyuam los sis tsev kawm ntawv preschool." Renee mus nrog nws tus xeeb txwv ua si thaum nws tus xeeb txwv mus koj kawm ntawv rov qab los txog tsev. Lub sij hawm uas nws mus nrog nws tus xeeb txwv nyob ua si thiab pab nws tus xeeb txwv, nws yeej nco qab txog cov sij hawm thaum mus pab nws tus viv ncaus nyob ntawm nws tus viv ncaus lub chaw zov me nyuam nyob hauv San Jose.



Thaum Lub Tsib Hlis 2022, Renee Tus Kws Nrhiav Hauj Lwm tau mus nrog ib lub tsev kawm ntawv preschool tham, thiab nws tau hais rau tus tuav lub tsev kawm ntawv hais tias nws xav kom Renee mus pab hauj lwm nyob ntawm lub tsev kawm ntawv sub Renee thiaj li yuav muaj txuj ci ua hauj lwm uas ib qhov kev pab cuam rau kev ua hauj lwm mam li them nyiaj rau Renee. Thaum Lub Rau Hli, Tim 9, 2022, Renee tau mus pib ua hauj lwm nyob ntawm lub preschool ntawd lawm. Renee yeej pab hauj lwm nyob hauv chav qhia ntawv uas muaj cov me nyuam muaj hnuv nyooq li ntawd 2 mus rau 5 xyoos. Txhua hnuv, Renee yeej pab tu chav qhia ntawv, pab muab tej khoom cia, thiab pab cov me nyuam ua ntau yam dej num; qhov nws nyiam tshaj yog thaum cov me nyuam mus zaum ua ib lub voj voos hu nkauj thiab/los sis seev cev. Cov nkauj yog ib cov uas ua rau cov me nyuam muaj kev lom zem, thiab kev seev cev yog ib qhov uas ua rau cov me nyuam yuav tau siv dag zog. Nws zoo siab heev thaum nws mus txog thiab/los sis thaum nws mus tsev es cov me nyuam los khawm nws. Vim muaj Southside Unlimited, Regional Center, thiab cov neeg ua hauj lwm hauv lub preschool pab, Renee twb mus ua txoj hauj lwm ua ib tus kws pab xib hwb qhia ntawv tau ntev li cuaj lub hlis lawm. Renee yeej ua tau hauj lwm coj los qhia rau nws tus kheej thiab nws lub chaw hauj lwm hais tias nws yeej yog ib tus neeg tseem ceeb ntawm cov neeg sib pab hauj lwm, thiab nws cia siab hais tias lub chaw hauj lwm yuav ntiav nws mus ua nws txoj hauj lwm mus ntxiv thaum nws ua tag lub sij hawm uas nws mus xyaum hauj lwm lawm. Ficabore pelectat qui delesedion rae



LUS QHUAS KEV UA HAUJ LWM

Sean



Sean yeej ib txwm siv ib qhov kev pab cuam uas muaj neeg saib xyuas rau feem ntau ntawm nws lub neej ua ib tug neeg laus. Nws yeej nyiam qhov hauj lwm nws ua nyob ntawm qhov kev pab cuam uas muaj neeg saib xyuas nws uas yog muaj cov hauj lwm tu tej nroj tsuag thiab txiav nyom nyob ntawm ib ncig tsev los sis chaw ua si, tiam sis thaum kawg lawv kuj tau muab nws tso nws tawm hauj lwm lawm. Thaum xyoo 2022, peb xa Sean mus rau tkMomentum. Sean yeej xav rov qab mus ua hauj tu nroj tsuag nyob ntawm ib ncig tsev los sis chaw ua si dua. Tiam sis, qhov yuav mus nrhiav cov hauj lwm CIE yeej yog ib qhov nyuaj vim hais tias Sean tsis muaj ntawv tsav tsheb. Ntxiv ntawd, tkMomentum tau nug mus rau lub chaw tu cov chaw ua si rau lub nroog saib lawv puas muaj hauj lwm qhib. Lub chaw tu cov chaw ua si rau lub nroog tsis muaj hauj lwm qhib nyob rau lub sij hawm ntawd, tiam sis lawv yeej xav kom Sean mus xyuam hauj lwm uas Sean yuav siv ib qhov Kev Xyaum Hauj Lwm Uas Them Nyiaj (Paid Internship Program), mus txog thaum muaj ib txoj hauj lwm qhib coj los pab kom Sean muaj cov txuj ci ua cov hauj lwm CIE nyob ntawm lawv lub chaw. tkMomentum twb muaj tag nrho cov ntaub ntawv uas yuav tsum tau muaj xa mus rau Alta Regional cov neeg sib pab hauj lwm tag lawm – Shea Sparkman, Tus Neeg Saib Xyuas Kev Pab, thiab Carly Shearer, Tus Kws Pab Neeg Nrhiav Hauj Lwm. Nkawv yeej tau muab lus pom zoo rau qhov kev pab ntawm no sai heev li. Sean twb ua nws txoj hauj PIP tau 6 hli lawm thiab nws paub yuav luag tag cov hauj lwm, tshwj hais tias nws yog cov hauj lwm uas yuav tau tsab tsheb xwb. Sean yeej pib hauj lwm ntxov li ntawm 7 teev sawv ntxov thiab nws yeej ua hauj lwm zoo heev li. Nws nyiam ua hauj lwm thiab nws tseem chim siab thaum nws yuav tsum tau so rau thaum cov hnuv zoo uas tsis muaj kev nyab xeeb, los sis cov hnuv uas nag los. Sean yeej muab nws txoj hauj lwm saib tseem ceeb heev thiab nws yeej zoo siab heev rau qhov hauj lwm nws ua.

Mitchell

Mitchell twb ua hauj lwm rau nws lub chaw hauj lwm tam sim no tau ntev tshaj ib 1 xyoo lawm. Mitchell yog ib Tus Neeg Ua Hauj Lwm Pab Qua/Ntsaig Khoom – nws pab nrhiav thiab xa khoom mus rau cov neeg yuav khoom uas yog muab cov khoom nyob hauv lub chaw muag khoom ntsaig coj mus tso rau hauv tus neeg yuav khoom lub tsheb. Mitchell yeej pab tau cov neeg yuav khoom zoo heev thiab nws yeej nyiam khiav hauj lwm pab cov neeg yuav khoom. Mitchell los yeej nyiam ua hauj lwm nrog cov neeg ua hauj lwm ib yam nkaus thiab nws yeej nyiam nrog nws cov neeg sib pab hauj lwm mus koom cov dej num uas lub tuam txhab muaj. Mitchell los yeej zoo siab heev rau cov kev pab los ntawm Tus Kws Pab Kev Kawm Hauj Lwm nyob ntawm On My Own Community Services; lawv tau pab muab nws tso mus ua txoj hauj lwm no thiab yeej tseem pab tsis tseg kom nws ua tau txoj hauj lwm uas nws tuav tam sim no.




LUS QHUAS KEV UA HAUJ LWM


Robert



Robert Jungnitsch yog ib tus tub hluas uas rau siab ua hauj lwm heev. Nws tsis yog ib txoj hauj lwm xwb, nws tseem ua ob txoj! Nws ua ib txoj hauj lwm puv sij hawm uas yog kho vaj kho tsev nyog ntawm ib lub tuam txhab uas tu ib koog tsev kem. Robert los kuj tseem ua ib txoj hauj lwm tsis puv sij hawm uas yog ua ib Tus Neeg Tu Vaj Tseg rau El Dorado County School District. Robert hais tias nws yeej nyiam mus ua hauj lwm thiab nws yeej muaj lus ua tsaug rau cov khoom thiab nyiaj pab uas nws cov chaw hauj lwm muab rau nws. Robert los kuj cog kev phooj ywg nrog nws chaw hauj lwm thiab cov neeg nrog nws ua hauj lwm ua ke kom muaj kev sib raug zoo ntev ntev mus nyob hauv txoj kev ua hauj lwm.



Kate



Thaum koj nyob ze Kate, qhov nyuaj yog qhov uas koj yuav tsis ua lub ntsej muag luag ntshi. Qhov uas nws koj tus cwj pwm zoo uas luag ntshi thiab ntxim nyiam yeej ua rau txhua tus neeg uas lawv ntsib nws muaj kev zoo siab. Kate cov phooj ywg coob tus yeej los ua tau pov thawj rau qhov ntawm no!

Kate yog ib tus neeg uas cov neeg nyob ncig ntawm nws lub zos thiab ib ncig hauv lub nroog paub coob. Nws cov phooj ywg thiab cov neeg nws paub yog cov uas nws ntsib lawv nyob ntawm cov dej num pab neeg uas nws tau ua, tawm cov kev mus pab hauj lwm dawb, thiab ntawm cov kev siv nws lub sij hawm mus pab lwm cov neeg. Nws yuav yog ib qhov nyuaj yog koj xav mus nrhiav ib chaw uas yuav tsis muaj cov neeg yuav khoom thiab cov neeg ua hauj lwm ntawm lub chaw ntawd paub Kate. Thiab yog thaum twg koj tsis pom Kate mus ncig hauv lub zos lawm, tej zaum koj yuav pom nws mus seev cev mloog neeg hu nkauj.

Kate yeej tau muab nws cov sij hawm ntau ntau teev koj mus pab nws lub zos los ntawm kev pab nyiaj txiag lawm. Nws yeej yog ib tus neeg muaj lub ntsej muag luag ntshi uas tau mus txais tos cov yim neeg uas lawv mus tos lawv cov neeg nyob ntawm Mercy Hospital thiab tseem muab dej rau lawv haus los sis khoom txom ncauj raws lawv noj tib si. Nyob ntawm ib chav tos neeg mob mus rau ib chav, koj yuav pom Kate thawb nws lub laub rau dej haus thiab khoom txom ncauj koj mus ua kom lwm cov neeg muaj kev sov siab. Kate txoj kev hlab rau cov me nyuam yaus tau koj nws mus ua ib tus neeg pab hauv chav qhia ntawv nyob ntawm Mustard Seed thiab ua ib tus kws qhia neeg nyob ntawm A Touch of Understanding.

Kate txuas ntxiv



Kate nyiam ua cov dej num ua si ntau ntau yam: ua kis las, kos duab thiab ua cov khoom uas siv tes ua, mloog nkauj, ua cov dej num uas yuav ua kom lub cev khov thiab muaj zog. Qhov nws nyiam kos duab thiab nyiam ua cov khoom uas siv tes ua tau coj nws mus pib ib lub lag luam, Faith Designs. Kate yuav tsim ib cov khoom uas cuam tshuam rau kev ntseeg thiab nws yuav mus koom cov kev sib sau sab nraud sub nws thiaj li yuav muag tau cov khoom uas nws tsim rau lwm cov neeg. Kate los kuj tau pab nws lub zos los ntawm nws lub lag luam thaum nws mus nrhiav nyiaj coj los yuav cov khoom siv uas Mustard Seed School tsis muaj siv.

Kate yeej paub qhov tseem ceeb ntawm txoj kev muaj ib lub suab los mus nrog lwm tus neeg sib txuas lus thiab sib tham. Qhov uas nws xav kom txhua tus neeg muaj ib lub suab tau coj nws mus ua hauj lwm rau CTEC uas nws yog tus ua qauv qhia cov neeg nrog nws ua hauj lwm ua ke uas lawv siv ib yam khoom AAC nrog rau kev coj ib pawg neeg hu ua Jazzy Talkers.

Txawm hais tias Kate yeej muaj hauj lwm ntau heev los, nws yeej nrhiav sij hawm coj los ua qhov dej num uas tseem ceeb tshaj rau nws. Kate yeej muaj kev sib raug zoo nrog nws tsev neeg thiab yeej nyiam nrog lawv ua ub ua no ua ke los sis nrog lawv nyob twb ywm so hauv tsev. Txawm hais tias Kate yuav nrog nws tsev neeg, tej phooj ywg nyob los yog ua ib yam dab si los, nws yeej muaj qhov qhia hais tias nws yog ib tus neeg txawj xav, muaj kev lom zem thiab hlub tshua lwm tus neeg. Yog li ntawd, yog koj tawm mus ncig hauv lub zos es ntsib Kate, nco ntsoov hu nws, thiab koj yuav pom nws ob lub qhov muag muaj kev zoo siab nrog nws lub ntsej muag luag ntxhi uas qhia hais tias nws yeej zoo siab pom koj.

Jackson thiab Anna: Kev Tsim Ib Qhov Kev Koom Tes Rau Kev Ua Lag Luam - Kev Ua Hauj Lwm Rau Tus Kheej



Jackson thiab Anna yeej yog ob tus neeg nyob hauv Davis, CA tib si, uas nkawv loj hlob thiab mus kawm ntawv nyob hauv tsev kawm ntawv them junior high ua ke. Nkawv yeej khwv heev rau txoj kev mus pab hauj lwm dawb nyob hauv nkawv lub zos, thiab nkawv ob leeg yeej hais tias nkawv nkag siab cov me nyuam yaus zoo.

Vim muaj kev pab los ntawm tus neeg siab xyuas kev khiav lag luam me thiab cov neeg pab kev ua lag luam, thiab vim cov nrooj sib tham hais txog kev ua hauj lwm rau tus kheej uas pheej muaj tsis tseg, Jackson thiab Anna thiaj li paub hais tias nkawv ua tau dab tsi zoo, thiaj li muaj cib fim los muab nkawv cov tswv yim ua lag luam coj sim ua, thiab thaum kawg, nkawv thiaj li txiav txim los koom tes qhib ib lub lag luam.

Jackson thiab Anna nkawv ob leeg yeej kawm tiav tsev kawm ntawv them high school rau xyoo 2002 thiab yeej paub me ntsis hais tias nkawv nyiam ua dab tsi. Jackson paub hais tias nws nyiam ua cov hauj lwm uas siv computer thiab txuj ci siv hauv computer (software). Nws qhia nws tus kheej siv Adobe Photoshop coj los tsim duab, thiab yeej txawj tsim cov duab uas ua rau neeg txaus luag. Thaum Jackson paub siv Photoshop zoo lawm, nws thiab cov neeg pab nws hais txog kev ua lag luam tau los sib tham nrhiav tswv yim ua lag luam.

Jackson tau mus nrog tus neeg saib xyuas kev ua lag luam me thiab cov neeg pab nws hais txog kev ua lag luam txhua txhua ob lim piam rau kev npaj los mus ua lag luam. Cov neeg pab nws hais txog kev ua lag luam tau pab nws ua ib qhov kev tshawb fawb coj los nrhiav saib puas yuav muaj neeg yuav nws cov duab. Nyob rau thaum ntawd, Jackson tau txiav txim siab mus kawm siv Adobe Photoshop ntxiv nyob ntawm Sacramento City College coj los ua kom nws muaj txuj ci ntau ntxiv.

Thaum nws muaj txuj ci siv computer thiab Photoshop ntau lawm, Jackson thiaj li tau muab cov nyiaj uas nws tseg tau cia siv coj mus yuav ib lub laptop thiab ib lub koob yees duab. Nws yeej tseem mus koom cov rooj sib tham hais txog kev ua lag luam txhua txhua ob lim piam tsis tseg ntxiv, los mus sib tham hais txog qhov nws ua tau tiav, hais txog cov nyiaj uas tau thaum nws muag nws cov duab, hais txog kev rov qab muab nws cov tswv yim coj los xyuas saib cov tswv yim twg yog cov ua hauj lwm thiab cov tswv yim twg yog cov tsis ua hauj lwm, thiab nrhiav ib cov tswv yim thiab dej num tshiab.

Jackson thiab Anna - txuas ntxiv

Nyob rau thaum ntawd, Anna tau mus ua ib txoj hauj lwm pab cov me nyuam yaus ua ib cov me nyuam dais nyob ntawm Build-A-Bear Workshop.

Zoo ib yam li Jackson, Anna yeej tau mus thov ib cov neeg pab nws nws ua ib qhov kev tshawb fawb saib nws cov tswv yim ua lag luam puas yog ib cov uas nws yuav siv tau koj mus qhib ib lub lag luam.

Cov neeg sib pab hauj lwm rau nws yeej xav hais tias kom nws muab cov tsiaj nws siv ntaub xov ua koj mus muag nyob ntawm ib lub laub. Tom qab ntawd, Anna tau mus yuav ib cov tsiaj siv ntaub xov ua thiab nws muab cov tsiaj koj mus dai rau ntawm ib lub khw muag paj saib puas muaj neeg yuav, tiam sis twb tsis muaj neeg yuav li.

Vim hais tias nws nyiam siv tshuab, cov neeg sib pab hauj lwm rau Anna hais rau nws hais tias kom nws mus kawm ua khawm tsho thiab hlau nplaum. Nws nyiam lub tswv yim ntawm no thiab nws tau siv nws cov nyiaj koj mus yuav ib lub tshuab ua khawm tsho thiab nws koj mus rau ib lub chaw kho khoom nyob ze nws kho tus tes nyob ntawm lub tshuab kom nws nias tau tus tes mus rau hauv yooj yim. Tiam sis nws yeej tseem yuav tsum tau ib tus neeg los mus tsim cov duab rau cov khawm tsho uas nws xav muag.

Cov neeg sib pab hauj lwm rau Jackson pom hais tias nws yuav yog tus neeg ua lag luam uas zoo rau Anna. Thaum cov neeg sib pab hauj lwm rau Jackson muab lub tswv yim ntawm no qhia rau Jackson, nws nyiam heev thiab nkawv thiaj li tau koom tes los mus nrhiav tswv yim kho lub lag luam ntxiv. Nkawv qhib Buttons 'n Bears, Oh My! thiab nkawv twb qhib thaum 2008 los lawm. Nrog cov khawm tsho thiab hlau nplaum, cov neeg yuav khoom yeej yuav tau cov tsiaj uas siv ntaub xov ua, thiab nkawv yeej muaj cov tsiaj ua khoom plig rau txhua yam kev zoo siab. Cov khawm tsho thiab hlau nplaum uas qhia kom Tseg Sij Hawm (Save-the-date) rau thaum neeg noj tshoob los sis rau thaum ua kev zoo siab rau ib tus poj niam uas cev xeeb me nyuam yog cov tsho thiab hlau nplaum uas neeg nquag yuav tshaj. Tej lag luam los yeej siv khawm tsho koj los kev qhuas rau lawv cov neeg ua hauj lwm.

Anna thiab Jackson, nrog cov kev pab los ntawm cov neeg sib pab hauj lwm ua lag luam rau nkawv, yeej mus nrog ib cov tib neeg thiab koom haum sib tham kom nkawv nrhiav tau cov qauv zoo koj los ua cov khawm tsho thiab hlau nplaum rau txhua yam kev zoo siab. Thaum lub lag luam tseem nyuam quav pib, Anna & Jackson yeej tau mus khob neeg qhov rooj mus muag nkawv cov khoom, thiab qhov no tau koj nkawv mus rau ntawm cov chaw khiav hauj lwm rau cov neeg sib tw mus tuav cov hauj lwm nyob hauv lub nroog. Nkawv zoo siab vim hais tias cov neeg sib tw mus tuav ib txoj hauj lwm hauv lub nroog uas lawv tau siv nkawv cov khawm tsho yeej yog cov uas yeej qhov kev sib tw hauv kev xais tsa txhua tus. Nkawv los kuj tau mus muag nyob ntawm ntau qhov kev sib sau los mus muag khoom nyob hauv lub zos thiab tam sim no nkawv yeej paub hais tias cov kev sib sau twg yog cov nkawv muaj khoom poob zoo thiab cov twg yog cov nkawv muag khoom poob tsis zoo. Thaum lub lag luam loj zuz lawm, nkawv yeej tau muab txoj kev npaj koj los tshaj tawm lag luam pauv mus kom muaj zoo li tej yam uas neeg xav tau. Cov neeg uas yuav nkawv cov khoom yog cov neeg uas lawv hnov los ntawm lwm tus neeg, cov neeg uas lwm tus hais kom lawv mus yuav, cov neeg uas yuav thaum nkawv mus muag khoom nyob ntawm cov kev sib sau los mus muag khoom, cov neeg uas lawv pom nkawv daim txiag tshaj tawm lag luam nyob ntawm ntug kev thiab cov neeg uas pom Jackson cov lus tshaj tawm lag luam nyob hauv social media.

Jackson thiab Anna yeej tsis muaj sij hawm li vim hais tias nkawv yeej muag nkawv cov khoom nyob ntawm nkawv lub chaw khiav hauj lwm nyob hauv Davis thiab nyob ntawm cov kev sib sau hauv lub zos, thiab nkawv yeej ua cov khaw tsho thiab hlau nplaum uas yuav siv tau rau ib qhov kev sib sau twg. Thaum nkawv koj Buttons 'n Bears, Oh My! koj mus teeb nyob ntawm cov kev sib sau hauv lub zos thiab ntawm cov rooj sib tham, neeg yeej pom Anna thiab Jackson nkawv npaj thiab tsim cov khoom tsho uas nkawv nyuam quav muaj. Txij li thaum nkawv qhib nkawv lub lag luam los txog tam sim no, zaum ua neeg yuav ntau tshaj plaws yog thaum lawv yuav 2000 lub khawm tsho koj mus siv rau kev sib tw hauv kev xaiv tsa. Yog xav paub ntxiv, nug mus rau: Buttons 'n Bears, Oh My! Tus Email: buttonsnbears@gmail.com Lub Vas Sab (Website): www.buttonsnbears.com

Justin


Justin (JJ) Ortiz twb pib ua hauj lwm rau PRIDE Industries thaum Lub Kaum Hli 2017 los lawm. JJ kawm ua cov hauj lwm tau sai thiab paub hais tias nws nyiam ua dab tsi. Lawv muab JJ tso mus ua hauj lwm rau Supported Employment Group nyob ntawm Beal Air Force Base ntawm ib lub chaw Npaj Khoom Noj, thiab nws twb ua hauj lwm nyob ntawm lub chaw ntawd tau ntau ntau hli lawm. Nws yog ib qhov uas zoo rau JJ kawm hais txog tej yam uas lub chaw hauj lwm xav kom ua tau, nrog rau txoj kev tu ib chav ua noj loj kom hu si, thiab txhua yam uas tub rog yuav tsum kom ua. Justin yeej tau mus kawm ua ntau txoj hauj lwm thiab yeej tau mus ua hauj lwm nyob ntawm Eskaton, Nevada County Fairgrounds thiab lwm cov koom haum los ntawm qhov kev pab cuam PRIDE los txog rau thaum 2019. Vim muaj kab mob sib kis loj, JJ tau nquag mus siv Zoom, thiab nws yeej nyiam nrog nws cov phooj ywg sib tham thiab nws yeej mloog ntsoov kom nws paub txhua yam hais nws txoj hauj lwm. Thaum lub caij nplooj ntoos zeeg hauv xyoo 2022, JJ tau siv cov txuj ci nws paub koj mus nrhiav tau ib txoj hauj lwm ua uas yog ib txoj hauj lwm ntxuav tais diav ua tsis puv sij hawm nyob ntawm Grass Valley ib lub khw noj mov. PRIDE los kuj rov qab muab nws tso mus siv qhov kev pab cuam Supported Employment Group dua. JJ zoo siab heev hais tias thaum muaj kab mob sib kis loj, nws tau mus kawm ntawv thiab mus xeeb tau nws daim ntawv tsav tsheb thiab yuav tau ib lub tsheb. Nws zoo siab hais tias txawm nws yuav xav mus qhov twg los nws yeej mus tau lawm, thiab nyuam qhuav tsis ntev los no, nws twb mus nws tus kheej mus ua si nyob Hawaii tag lawm.



Paul



**Paul
Bonner tau
sau ib tsab
ntawv rau
peb - Thov
Nrog Paul
Zoo Siab!**



Nathan - State Employment Initiative (Lub Xeev Tsab Cai Rau Kev Ua Hauj Lwm)




Kuv lub npe yog hu ua Nathan Martin, kuv yug thiab loj hlob nyob hauv Sacramento, kuv muaj tus kab mob Autism, thiab kuv ua hauj lwm rau Xeev California, uas kuv tau los nawm State Employment Initiative nyob ntawm ALTA California Regional Center. Kws kho mob tau kuaj pom hais tias kuv muaj tus kab mob Autism thaum kuv muaj 4 xyoos thiab txij li thaum kuv nco tau los, kuv yeej yog ib tus neeg mus siv lub chaw regional center. Tom qab kuv kawm tag High School, kuv mus kawm ntawv nyob ntawm Los Rios Community Colleges, feem ntau yeej yog nyob ntawm Sacramento City College. Thaum xyoo 2011, kuv tau khiav tsev mus nyob ze me ntsis rau ntawm Sacramento City College, uas yog ib kem ntawm ib lub tsev kem uas Sacramento Housing and Redevelopment Agency muab rau kuv nyob, thiab kuv yeej nyob ntawm lub tsev ntawd los txog rau tam sim no li. Kuv yeej zoo siab hais tias kuv muaj kuv ib kem tsev nyog uas muaj ib chav pw, tiam sis qhov kuv xav tau yog xav kom kuv pab tau kuv tus kheej, thiab qhov no yog txhais hais tias kuv yuav tsis noj nyiaj SSI lawm, yuav muaj ib txoj hauj lwm ua, thiab yuav mus kawm kom tau ib daim ntawv kawm tiav tsev kawm ntawv qib siab rau ib yam kev kawm. Kuv yeej muaj teeb meem nrhiav yam kev kawm uas haum rau kuv nyob hauv tsev kawm ntawv qib siab vim kuv yeej yog ib tus me nyuam kawm ntawv Special Ed feem ntau hauv kuv lub neej thiab kuv yeej tsis muaj cib fim yuav txiav txim hais tias kuv xav ua dab tsi li. Neeg ib txwm hais rau kuv hais tias nws yeej yuav tsis muaj neeg ntiav kuv mus ua hauj lwm li, kuv yeej yuav noj nyiaj SSI mus tag kuv lub neej, thiab kuv yog ib tus neeg uas yuav nkim cov kev pab xwb. Tom qab mus kawm, kawm dhau, tso tseg, kawm tsis dhau ntau ntau qhov kev kawm nyob hauv tsev kawm ntawv qib siab, kuv thiaj li txiav txim mus kawm Anthropology (Kev Kawm Txog Tib Neeg Txoj Kev Ua Neeg Nyob). Nyob rau tib lub sij hawm ntawd, kuv tau pib mus koom ib cov neeg sib pab tswv yim rau cov neeg muaj kab mob Austism zoo li kuv thiab lawv tau qhia ib lub lag luam zoo heev hu ua Progressive Employment Concepts rau kuv, uas yog nyob hauv Citrus Heights. Thaum kuv mus nrog lub koom haum ntawm no tham tag, nws yog ib qhov uas ua rau kuv lub neej pauv. Lawv muab ntaub ntawv thiab qhia kuv hais txog qhov hais tias saib kuv yuav ua li cas kuv thiaj li yuav tuav tau ib txoj hauj lwm, kuv yuav ua li cas thaum kuv nrog cov neeg ua hauj lwm thiab cov neeg siab xyuas neeg ua hauj lwm sib tham, thiab lawv muab lus txhawb kuv lub zog kom kuv sov siab mus ua ib txoj hauj lwm thiab kom kuv xav tau hais tias kuv yeej muaj ib lub hom phiaj zoo los mus ua ib tus tib neeg.

Vim Progressive Employment Concepts thiab Department of Rehabilitation, lawv thiaj li txais kuv mus rau hauv State Employment Initiative, uas yog ib lub chaw pab cov tib neeg muaj teeb meem rau ntawm txoj kev loj hlob nrhiav cov hauj lwm uas mus ua rau lub xeev. Nws yeej siv sij hawm ntau ntau hli, tiam si peb kuj nrhiav tau ib lub chaw tuav dej num rau kuv mus ua hauj lwm lawm. Tom qab nrhiav tau txoj hauj lwm ntawm no, ntau yam yeej pib ua rau kuv kaj siab lawm. Kuv thiaj li tsis noj nyiaj Social Security lawm, kuv thiaj kawm tau kuv daim Associate's Degree rau Anthropology (nrog rau 3 yam ntxiv uas kuv tau kawm) rau thaum xyoo 2019, thiab kuv thiaj li mus xeem tau kuv daim ntawv tsav tsheb rau thaum xyoo 2021. Kuv yeej nyiam ua hauj lwm rau lub chaw tuav dej num uas kuv ua ntawd thiab yog hais tias nws tsis muaj cov kev pab thiab kev txhawb los ntawm ALTA California Regional Center, Progressive Employment Concepts, Best Buddies thiab Department of Rehabilitation, kuv lub neej yuav nyob txawv qhov kuv muaj hnuv no. Kuv yeej ua tsaug tsis tag rau cov lag luam ntawm no uas tau sib zog pab los mus muab cov neeg xiam oob qhab zoo li kuv coj mus tso rau hauv cov hauj lwm uas yuav pab tau peb lub neej, peb txoj kev muaj nyiaj txiag siv, peb txoj kev nyob tau tsuaj, thiab peb lub neej tom ntej ntau heev. Kuv lub hom phiaj tseem ceeb yog ua lub Xeev Ib Tus Neeg Ua Hauj Lwm mus txog hnuv kuv tawm mus so hauj lwm, thiab saib puas muaj hnuv uas kuv yuav mus yuav tau ib lub tsheb thiab ib lub tsev kheej los sis ib tsev condominium coj los ua kuv tug.

ACRC COV TXWJ LAUS TAU MUS NCIG XYUAS MIRASOL VILLAGE THIAB CHAW KHO H尼亚V

Thaum Lub Ob Hlis, Tim 14, 2023, ACRC Cov Txwj Laus tau mus xyuas Mirasol Village uas yog ACRC thawj koog tsev kem thiab lub chaw kho hniaiv. Ob qhov kev tsim tsa ntawm no yeej puav leej yog ib cov kev tsim tsa uas peb siv cov nyiaj Community Placement Plan thiab Community Resource Development coj los ua. Peb yuav muaj lus qhia ntix txog lub chaw kho hniaiv nyob hauv tsav xov xwm txuas ntxiv tom ntej.



LUS QHUAS COV NEEG UAS PEB PAB - SHELBY WRIGHT

Nyob zoo, kuv yog Shelby Wright thiab kuv muaj hnuv nyoog 24 xyoos. Kuv yog ib tus neeg laus uas kuv nyob tau kuv tus kheej thiab nyob hauv tsev nyob ntawm ib lub zos uas kuv nyiam, nrog kuv tsev neeg uas lawv yeej pab kuv. Kuv muaj ntau ntau yam uas kuv nyiam thiab kuv yeej nyiam ntsib tib neeg. Kuv yeej paub coob tus neeg nyob hauv kuv lub zos thiab lawv yeej paub kuv ib yam nkaus. Kuv yeej tau nrog cov neeg sib pab hauj lwm rau kuv sib tham los mus teev ib cov sij hawm txhua hli rau kuv mus ua tej yam uas kuv nyiam, mus nrog coob tus neeg sib tham ua si, thiab mus koom cov kev sib sau nyob hauv lub zos. Kev teev sij hawm rau kuv mus ua tej yam uas kuv muaj txuj ci rau kev txuas lus thiab rau kev tawm suab rau kuv tus kheej yeej yog ib yam tseem ceeb rau kuv. Kuv yeej tseem nrhiav kev mus ua cov dej num uas kuv yuav muaj cib fim mus nrog neeg sib tham thiab ua si thiab mus pab cov dej num hauv lub zej zos ntxiv. Kuv zoo siab hais tias lub caij ntuj sov twb los yuav txog lawm, vim nws yuav muaj ntau yam rau kuv mus ua.



Kuv tsev neeg thiab cov neeg sib pab khiav hauj lwm rau kuv yeej yog cov neeg uas lawv paub hais tias cov kev sib sau thiab cov dej num twg yog cov kuv nyiam mus koom los sis nyiam mus ua. Kuv yeej mus ua tswv caub rau ntau ntau qhov chaw nyob hauv lub zos zoo li Crocker Art Museum, Funderland, thiab Sacramento Zoo. Kuv nyiam mus ncig lub khw tshav puam Saturday Farmer's Market nyob hauv plawv nroog uas kuv yuav pom cov neeg kuv paub thiab lawv yuav paub kuv coob. Kuv yeej cia siab hais tias kuv yuav pom lawv, thiab lawv los yeej cia siab hais tias lawv yuav pom kuv!

Mloog suab nkauj thiab ua luam dej yog ob yam dej num ntawm cov dej num uas kuv nyiam ua. Kuv nyiam mus mloog neeg hu nkauj nyob ntawm Torch Club nyob hauv Sacramento txhua lim piam, thiab nyiam mus koom cov kev hu nkauj nyob ntawm cov chaw mus nyob ua si thaum muaj huab cua zoo. Kuv nyiam ntaus lub nruas thiab mloog suab paj nruas kom tsis txhob muaj kev nyuaj siab. Kuv nyiam mus ua luam dej nyob ntawm lub tsev ua kis las nyob hauv kuv lub zos li ntawm 3 mus rau 4 zaug rau ib lim piam. Nws yeej muaj ntau tus neeg nyob ntawm lub pas ua luam dej paub kuv!

Ib lub ntawm kuv cov hom phiaj yog los mus qhia lwm cov neeg hais txog qhov kuv siv kuv lub iPab-Touchchat coj los nrog neeg sib txuas lus thiab hais txog qhov kuv mloog suab nkauj thaum kuv kawm ib yam dab tsi. Muaj tej lub sij hawm kuv yeej mus koom Jazzy Talkers cov rooj sib tham, ib lub chaw rau cov neeg sib tham siv AAC mus sib tham uas kuv mus nrog kuv cov phooj ywg sib txuas lus. Kuv nyuam qhuav mus pib ib cov kev kawm txhua lim piam coj los ua kom kuv paub ntau lo lus ntxiv sub kuv thiaj li hais tau ntau yam ntxiv nyob hauv yam khoom kuv siv coj los txuas lus. Kuv yeej muaj ntau yam uas kuv xav hais! Kuv yeej paub ntau zuj zus ntxiv hais txog qhov hais tias kuv xav ua dab tsi, thiab zoo li nej pom, nws yeej muaj ntau yam uas kuv nyiam! Kuv yeej xav hais tias kuv pib tau zoo kawg lawm, cov tub ntxhais hluas uas muaj hnuv nyoog ib yam li kuv yeej pib lawv txoj kev ua neej thiab pib xav txog txoj kev ua hauj lwm lawm. Kuv xav hais tias qhov tseem ceeb, kuv tsum tau muab txhua yam uas muaj rau kuv ua coj los xav kom txhua ua ntej kuv yuav txiav txim hais txog kev ua hauj lwm. Kuv twb mus sim ua ob peb txoj hauj lwm lawm tiam sis tseem nrhiav tsis tau ib txoj hauj lwm uas kuv nyiam li. Kuv tab tom xav hais tias cia kuv mus pab hauj lwm dawb thiab mus sim ua hauj lwm rau ntau lub chaw ntxiv coj nrhiav ib txoj hauj lwm uas haum rau kuv. Nws yuav yog ib qhov zoo yog hais tias txoj hauj lwm ntawd yeej yog ib txoj uas muaj suab nkauj thiab muaj neeg coob nyob rau ntawd! Qhov no yog ib qhov chaw pib uas zoo rau kuv thiab tej zaum nws kuj yuav yog ib lub tswv yim zoo rau koj ib yam nkaus thiab. Kuv xav kom kuv ntsib neeg tsis tseg ntxiv thiab xav ua kom kuv paub ntau yam coj los npaj kuv lub neej uas kuv yuav yog tus txiav txim thiab yuav tsis muaj kev sib cais! Kuv cia siab hais tias yog koj pom kuv nyob ib ncig hauv lub zos koj yuav los hais nyob zoo rau kuv.

MUAB ACRC COJ LOS SAIB ZOO LI IB COV LEJ

Koj puas paub hais tias ACRC pab tau neeg coob txog li 1000 tus neeg ntxiv txhua xyoo?

Ntawm no yog cov neeg uas peb tau pab los txog rau thaum Lub Peb Hlis, Tim 15, 2023:

Early Start (Cov Neeg Uas Pib Ntxov) - 2377

Cov Neeg Uas Lanterman Pab - 25,858

Suav Tag Nrho Ua Ke = 28,235

LUS QHIA NTXIV TXOG KEV TSIM COV KEV PAB

Cov kev pab uas pauv nyob rau nyob hauv peb lub hlis (quarter) tag los no.

Cov Chaw los sis Neeg Tshiab Uas Yuav Los Npaj Kev Pab

**TUS NEEG SAIB XYUAS KEV KHIAB HAUJ LWM
UAS YOG IB TUS NEEG SAB NRAUD**

Earl Gage Jr.

**TUS KWS KHO MOB UAS MUAJ KEV KAWM
TXOG NEEG TXOJ KEV XAV**

Dorcas Liriano Roa, PHD
The Blooming Mind, LLC

KEV PAB RAU COV KEV KHO TSHWJ XEEB (3-20)

Psychwest
MMW Psychological Service

**KEV PAB RAU COV NEEG UAS LAWV NYOB
TAU LAWV TUS KHEEJ**

Hands United, LLC

**KEV PAB RAU COV KEV KHO TSHWJ XEEB
(21 & rov saum)**

Psychwest

Tsev Rau Cov Neeg Laus Mus Nyob

Marysville-Yuba Care Home
Wellcare Homes 4 - Engle

TUS NEEG UAS PAB IB TUS NEEG

Janny D Kenyon

**COV NYIAJ NTXIV ROV QAB RAU KEV
NPAJ COV KEV SIB SAU LOS MUS SIB
THAM UA SI**

Tau ntxiv nyiaj rov qab 22 nyob hauv peb lub
hlis ntawm no.

**KEV PAB RAU COV NEEG UAS LAWV NYOB TAU
LAWV TUS KHEEJ**

E&E Agency

Cov Chaw los sis Cov Neeg Npaj Kev Pab Uas Tsis Muaj Lawm

**TUS KWS PAB COV NEEG UAS LAWV NYOB TAU
LAWV TUS KHEEJ**

Pamela La Pask

**KEV KAWM TXOG KEV HAIS TAU LUS
(SPEECH PATHOLOGY)**

MOTOR MOUTH SPEECH
TALK WITH ME THERAPIES

KEV TUAV NYIAJ TXIAG

C&J PAYEE

LUS PIAV QHIA TXOG IB TUS KWS KOS DUAB UAS PEB TAU XAIV COJ LOS QHIA RAU SAWV DAWS - JACOB MADDOX



Jacob Maddox yog ib tug kws kos duab uas paub kos duab thiab muaj kev xav tau tob thiab kev xav los tsim duab. Neeg yeej pom nws txoj kev paub kos duab nyob hauv cov kev kawm ua cov khoom uas nws siv Av Coj Los Puab, siv Cwj Mem los sis Xim Coj Los Kos, thiab cov Khoom Uas Pom Peb Seem (Three-Dimensional). Nws los kuj tseem paub sau nkauj thiab ntaus kiv taj. Nws yog ib tus txiv neej uas tsis hais lus pes tsawg, tiam sis Jacob yeej muab nws cov tswv coj mus qhia nyob rau hauv nws cov duab thiab peb yeej pom hais tias nws muaj ntau yam uas nws yuav muab coj los qhia rau sawv daws!

Yog xav yuav nws cov duab los sis khoom, sau email mus rau mariew@placerarc.org los sis hu 916-781-6911 thiab neeg yeej mus nrhiav tau lus qhia ntxiv txog Studio 700 nyob ntawm phab ntawv Arc of Placer County's Facebook thiab nyob ntawm www.placerarc.org.



Qhov Kev Thov Kom Npaj Kev Pab Rau Tsev Neeg Uas Muaj Kev Saib Xyuas

Yam Kev Tsim Tsa: Cov Kev Pab Rau Tsev Neeg Uas Muaj Kev Saib Xyuas(CFS)

Lus Piav Qhia Txog Qhov Kev Tsim Tsa: Cov neeg los sis chaw uas npaj cov kev pab CFS yuav saib xyuas thiab npaj cov khoom qhia nyob hauv qab no rau cov neeg laus uas lawv nrog tsev neeg nyob. Cov kev pab CFS yuav tsum yog ib cov uas npaj raws li tej yam uas cov neeg thiab lawv tsev neeg yuav tsum tau siv thiab yuav tsum npaj kom tsis txhob muaj qhov ua tau siab lawv yam lus thiab lawv tej kab lis kev cai. Nws yuav tsum yog ib qhov uas mus npaj rau tus neeg siv nyob hauv tus neeg lub tsev. Cov kev pab CFS yog muaj, tiam sis tsis yog tag rau:

- Kev paub thiab kev npaj cov kev pab uas yuav tsum tau muaj coj los ua kom tus neeg nyob tau hauv tsev neeg lub tsev.
- Npaj kev pab thiab kev qhia rau tus neeg, thiab nws tsev neeg, kom lawv paub siv cov kev pab thiab kev txhawb uas npaj raws li qhov lawv yuav tsum tau siv suav nrog rau kev tsim cov hauv kev coj los tshem cov teeb meem ntawm kev mus siv cov kev pab uas ib txwm muaj thiab lwm cov kev pab.
- Kev npaj muaj ntaub ntawv qhia ntxiv los sis kev pab ntxiv rau tus neeg qhov kev kuaj tus neeg tus mob thiab cov kev pab uas twb paub lawm.
- Kev saib xyuas kom muaj kev qhia zoo ib yam rau cov neeg los sis chaw npaj kev pab raws li qhov tus neeg thiab nws tsev neeg yuav tsum tau siv.
- Kev pab rau kev teem sij hawm mus pab tus neeg suav nrog rau cov sij hawm mus kho mob thiab mus ua lwm yam.
- Paub hais tias yuav siv qhov kev thauj mus los twg.
- Paub cov neeg los sis chaw npaj kev pab uas yuav mus pab tau thaum ib tus neeg los sis ib lub chaw npaj kev pab mus pab tsis tau thiab kev hais kom cov neeg los sis chaw ntawd mus pab yog thaum tus neeg los sis chaw uas ib txwm mus pab tus neeg ho mus pab tsis tau.
- Kev npaj muaj cov kev pab yav tom ntej rau tus neeg, suav nrog rau cov neeg uas lawv nrog ib tus neeg tu uas muaj hnuv nyoog siab nyob.
- Kev npaj muaj kev qhia kom tus neeg pab tau nws tus kheej txog li qhov nws pab tau.

Cov kev pab CFS yuav tsum tsis txhob yog ib cov kev pab uas muab coj los pauv los sis zoo ib yam li ib qhov kev pab uas lub chaw regional center muaj, ib qhov kev pab uas ib txwm muaj los sis lwm yam kev pab uas lub chaw regional center yog tus them rau tus neeg thiab nws tsev neeg siv tam sim no. Cov kev pab CFS yuav tsum tsis txhob yog ib cov kev pab uas ib tus neeg nyob hauv lub tsev uas tus neeg no nyob yog tus npaj. Qhov tsawg kawg nkaus, peb yuav tsum tau muab qhov kev pab coj los soj ntsuam txhua xyoo, nrog ib qhov kev qhia txhua txhua peb lub hlis hais tias muaj zoo li cas lawm.

Peb xav kom cov tib neeg uas muaj cov teeb meem zoo li nram qab no los mus teb Qhov Kev Thov Kom Npaj.

Tej Yam Uas Tus Neeg Yuav Tsum Tau Muaj Es Nws Thiaj Li Yuav Mus Ua Tau Tus Neeg Npaj Kev Pab Ncaj Nqa Rau Ib Tus Neeg Siv:

Tus Neeg Saib Xyuas Cov Kev Pab CFS Uas Pab Ncaj Qha Rau Ib Tus Neeg (CFS Direct Support Coordinator): Kawm tiav tsev kawm ntawv qib siab ob xyoo rau phab kev pab tib neeg los sis tau mus ua ib txoj hauj lwm pab cov neeg muaj teeb meem rau ntawm txoj kev loj hlob tau ntev li 3 xyoos; Paub hais yam lus uas tus neeg thiab nws tsev neeg paub;

Paub txog txoj kev khiav hauj lwm hauv Regional Center.

Tus Neeg Saib Xyuas Cov Neeg los sis Chaw Npaj Cov Kev Pab CFS (CFS Supervisor): Kawm tiav tsev kawm ntawv qib siab plaub xyoo rau phab kev pab tib neeg los sis kawm tiav tsev kawm ntawv qib siab ob xyoo rau phab kev pab tib neeg thiab tau mus ua ib txoj hauj lwm pab cov neeg muaj teeb meem rau ntawm txoj kev loj hlob tau ntev li 3 xyoos.

Peb yuav muab cov kev zam rau tej yam uas ib tus neeg yuav tsum tau muaj es nws thiaj li yuav mus tuav tau txoj hauj lwm no, nrog rau qhov qhia hais tias yog vim li cas, xa mus rau lub chaw regional center rau lub chaw Department of Developmental Services txheeb xyuas thiab txiav txim.

Qhov Kev Pab Yog Muaj Txog Li Cas: Nyob hauv thawj 30 hnuv uas ib tus neeg npaj kev pab tau mus pab ib tus neeg thiab nws tsev neeg, cov neeg npaj cov kev pab CFS yuav tsum tau muaj kev qhia rau lawv cov neeg ua hauj lwm thiab cov neeg saib xyuas cov neeg ua hauj lwm hais txog txoj kev mus pab tus neeg suav nrog rau, tiam sis tsis yog tag rau, cov kev pab rau kev coj tus cwj pwm thiab lub chaw Area Agencies of Agig uas muaj nyob ze ib ncig ntawd.

Siv cov chaw muaj kev pab nyob ze ib ncig ntawd thiab muab cov kev pab ntawd siv coj los kho thiab tsim ib cov kev pab uas yeej muab tus neeg saib ua qhov tseem ceeb thiab yeej yog ib cov kev pab uas npaj rau tib tus neeg nkaus xwb.

Cov Nqi Rau Kev Xa Tsab Ntawv Thov Mus: Cov tib neeg uas teb Qhov Kev Thov Kom Npaj ntawm no yog tus yuav tau them tag nrho cov nqis uas cuam tshuam rau txoj kev tsim thiab txoj kev xa lawv Pob Ntawv Thov RFP. Yuav muab tsis tau qhov nqi rau Alta California Regional Center, the Department of Development Service los sis Xeev California them.

Xa mus rau: Jason Scantlebury, Tus Kws Saib Xyuas Cov Kev Pab Nyob Hauv Zej Zos (916) 978-6336 jscantlebury@altaregional.org